



Broj: 02-05-2254-9.2/16
Sarajevo, 28.01.2016. godine

Na osnovu člana 26. i 28. stav 4. Zakona o Vladi Kantona Sarajevo („Službene novine Kantona Sarajevo“, broj: 36/14 – Novi prečišćeni tekst i broj: 37/14 – Ispravka) i člana 89. Zakona o osnovnom odgoju i obrazovanju („Službene novine Kantona Sarajevo, br.: 10/04, 21/06, 31/11 i 15/13), Vlada Kantona Sarajevo, na **29. sjednici** sjednici održanoj **28.01.2016.** godine, donijela je sljedeći

ZAKLJUČAK

1. Prihvata se Informacija o realizaciji Zaključka Vlade Kantona Sarajevo broj: 02-05-211-5/16 od 07.01.2016. godine sa prijedlogom mjera. koja je sastavni dio ovog Zaključka.
2. Za praćenje i provođenje mjera utvrđenih u Informaciji iz tačke 1. ovog Zaključka, formira se Radna grupa koju čine predstavnici: Ministarstva za rad, socijalnu politiku, raseljena lica i izbjeglice, Ministarstva za obrazovanje nauku i mlade, Ministarstva zdravstva, Ministarstva kulture i sporta, Ministarstva unutrašnjih poslova i Ministarstva pravde i uprave Kantona Sarajevo.
Obavezuju se navedena ministarstva da imena svojih predstavnika za Radnu grupu dostave Ministarstvu za rad, socijalnu politiku, raseljena lica i izbjeglice Kantona Sarajevo.
3. Zadužuje se Ministarstvo za rad, socijalnu politiku, raseljena lica i izbjeglice Kantona Sarajevo da formira Radnu grupu za realizaciju mjera koje se odnose na aktivnosti iz nadležnosti Ministarstva i javnih ustanova.
4. Zadužuje se Ministarstvo za rad, socijalnu politiku, raseljena lica i izbjeglice Kantona Sarajevo da o realizaciji mjera sadržanih u Informaciji iz tačke 1. ovog Zaključka redovno informiše Vladu Kantona Sarajevo.
5. Informacija iz tačke 1. ovog Zaključka dostavlja se Skupštini Kantona Sarajevo, **informativno.**

PREMIJER

Elmedin Konaković



web: <http://vlada.ks.gov.ba>
e-mail: vlada@vlada.ks.gov.ba
Tel: + 387 (0) 33 562-068, 562-070
Fax: + 387 (0) 33 562-211
Sarajevo, Reisa Džemaludina Čauševića 1



Bosna i Hercegovina
Federacija Bosne i Hercegovine
KANTON SARAJEVO
Ministarstvo za rad, socijalnu politiku,
raseljena lica i izbjeglice

INFORMACIJA O REALIZACIJI ZAKLJUČKA VLADE KANTONA SARAJEVO
broj: 02-05-211-5/16 od 07.01.2016. godine

Sarajevo, januar 2016. godine

INFORMACIJA O REALIZACIJI ZAKLJUČKA VLADE KANTONA SARAJEVO

broj: 02-05-211-5/16 od 07.01.2016. godine

Ministarstvo za rad, socijalnu politiku, raseljena lica i izbjeglice Kantona Sarajevo je po pitanju prevencije maloljetničkog prijestupništva i rada sa maloljetnicima u sukobu sa zakonom, sa akcentom na iniciranju poboljšanja pojedinih pravnih rješenja kroz izmjene i dopune propisa koji tretiraju ovu problematiku, prvenstveno Zakona o zaštiti i postupanju sa djecom i maloljetnicima u krivičnom postupku i Zakona o socijalnoj zaštiti, zaštiti civilnih žrtava rata i zaštiti porodice sa djecom, dana 25.01.2016. godine organizovalo sastanak kojem su prisustvovali predstavnici: kantonalnih ministarstava (Ministarstvo pravde i uprave, Ministarstvo za obrazovanje nauku i mlade, Ministarstvo zdravstva, Ministarstvo unutrašnjih poslova), federalnih ministarstava (Ministarstvo rada i socijalne politike, Ministarstvo zdravstva i Ministarstva pravde), federalnih inspektora iz pomenutih resora, Kantonalnog tužilaštva, Institucije Ombudsmena/Ombudsmana za ljudska prava BiH, Fakulteta za kriminalistiku, kriminologiju i sigurnosne studije i javnih ustanova iz oblasti socijalne zaštite.

Nakon trosatne konstruktivne diskusije po ovoj temi, u kojoj su učestvovali svi prisutni konstatovano je da zakoni koji tretiraju oblast maloljetničkog prijestupništva (Zakon o zaštiti i postupanju sa djecom i maloljetnicima u krivičnom postupku, Zakon o krivičnom postupku, Krivični zakon, Zakon o prekršajima, Zakon o izvršenju krivičnih sankcija i Zakon o socijalnoj zaštiti, zaštiti civilnih žrtava rata i zaštiti porodice sa djecom) sadrže kvalitetna rješenja i različite mogućnosti tretiranja ovog problema, ali nedovoljna primjena istih za posljedicu ima sve veće prisustvo međuvršnjačkog nasilja i nasilja u porodici.

Kao uzroke nedovoljne primjene zakona učesnici sastanka su istakli slijedeće:

- Zakon o zaštiti i postupanju sa maloljetnicima u krivičnom postupku bez obzira što je stupio na snagu u februaru 2015. godine nije u potpunosti u primjeni iz razloga što nije obezbijeden minimum pretpostavki kao što su: certificiranje službenih lica (policajaca, socijalnih radnika, tužilaca, branitelja); nije blagovremeno donesen Pravilnik o primjeni mjere policijskog upozorenja (Pravilnik usvojen u novembru 2015. godine); nije usaglašena Uredba o primjeni odgojnih preporuka prema maloljetnicima; nije donesen Pravilnik o primjeni posebnih obaveza prema maloljetnim učiniocima krivičnih djela; nije donešeno Uputstvo o načinu vođenja evidencije o izrečenim odgojnim mjerama; nije izvršena preregistracija postojećih ustanova za izvršenje mjera i sankcija koje propisuje ovaj zakon; nije izvršeno usaglašavanje odredaba Krivičnog zakona, Zakona o krivičnom postupku i Zakona o izvršenju krivičnih sankcija, Zakona o prekršajima kao i Zakona o socijalnoj zaštiti, zaštiti civilnih žrtava rata i zaštiti porodice sa djecom.

Generalni stav učesnika sastanka je da su rješenja u Zakonu o zaštiti i postupanju sa djecom i maloljetnicima u krivičnom postupku kvalitetna, da su usaglašena sa međunarodnim aktima, da sadrže elemente prevencije, te da bez obzira na nomotehničke greške u ovom momentu nema potrebe za suštinskim izmjenama ovog Zakona nego da je potrebno donijeti provedbene akte i početi sa primjenom istih.

- Maloljetničko prijestupništvo ima korijene u porodici koja evidentno gubi osnovne funkcije (odgojnu, zaštitnu, ekonomsku...) a društvo nije obezbijedilo pretpostavke za preuzimanje tih funkcija.

- Djeca u porodici ne mogu zadovoljiti svoje potrebe što dovodi do njihovog zapostavljanja i zanemarivanja a to za rezultat ima izraženo devijantno ponašanje prema okolini (što se najčešće manifestuje u školi).
- Propuštanje pravovremenog otkrivanja, evidentiranja i prijavljivanja nadležnim organima prisustva rizika devijantnog ponašanja.

Obzirom na uzroke učesnici sastanka su konstatovali da je bez obzira na postojeće kapacitete (prostorne, finansijske, kadrovske, tehničke...) hitno potrebno mobilizacijom raspoloživih resursa uticati na prevenciju maloljetničkog prijestupništva i aktivno raditi na eliminaciji uzroka koji do istog dovode.

Imajući u vidu naprijed izloženo, Ministarstvo za rad, socijalnu politiku, raseljena lica i izbjeglice Kantona Sarajevo predlaže slijedeće **mjere**:

- poduzeti aktivnosti na praćenju dosljedne primjene odredaba Porodičnog zakona u dijelu koji se odnosi na poduzimanje potrebnih mjera radi zaštite prava i najboljeg interesa djeteta.
- pružiti podršku roditeljima u ostvarivanju njihovih roditeljskih prava i dužnosti (zaštita djeteta od svih oblika poroka: droga, alkohol, skitnja, prosjačenje, nasilje...)
- u saradnji sa JU "Služba za zapošljavanje kantona Sarajevo" Sarajevo kroz programe mjera zapošljavanja obezbijediti kadrovske kapacitete u javnim ustanovama iz oblasti socijalne zaštite nadležnim za primjenu Zakona, a u cilju intenzivnijeg rada na identifikaciji djece u riziku (sačinjavanju individualnih planova zaštite za svako identificirano dijete u riziku, identifikaciji svih institucija i njihovo uključivanje u rad na eliminaciji uzroka rizika) i osnaživanju porodice.
- obezbijediti pretpostavke za dosljednu primjenu odgojnih preporuka (uključivanje maloljetnih počinitelja krivičnih djela u: rad bez naknade u humanitarnim organizacijama ili poslove socijalnog, lokalnog ili ekološkog sadržaja, redovno pohađanje škole, liječenje u odgovarajućoj zdravstvenoj ustanovi, uključivanje u pojedinačni ili grupni tretman odgojnih, obrazovnih, psiholoških i drugih savjetovališta)
- planirati i obezbijediti finansijska sredstva za sticanje sertifikata medijatora a radi izvršenja odgojnih preporuka (lično izvinjenje oštećenom i nadoknada štete oštećenom), te radi obezbjeđenja pretpostavki za vanredno školovanje (polaganje ispita) djeci maloljetnim počiniocima krivičnih djela koja su izgubila pravo na redovno školovanje.
- u cilju obezbjeđenja uslova za izvršenje izrečene sankcije upućivanja u posebnu ustanovu za liječenje i osposobljavanje, Ministarstvo će pristupiti izradi izmjena i dopuna Zakona o socijalnoj zaštiti, zaštiti civilnih žrtava rata i zaštiti porodice sa djecom u djelu dopune djelatnosti JU Terapijska zajednica - Kampus Kantona Sarajevo koja se odnosi na izvršenje sankcije.

Predložene mjere će se realizovati putem javnih ustanova iz nadležnosti ovog ministarstva i to: JU "Kantonalni centar za socijalni rad", KJU "Porodično savjetovalište", KJU "Disciplinski centar za maloljetnike" i JU Terapijska zajednica - Kampus Kantona Sarajevo, a uz aktivno učešće Ministarstva za obrazovanje nauku i mlade Kantona Sarajevo, Ministarstva zdravstva Kantona Sarajevo, Ministarstva kulture i sporta Kantona Sarajevo, Ministarstva unutrašnjih poslova i Ministarstva pravde i uprave Kantona Sarajevo u okviru njihove nadležnosti.

Napominjemo da bez ozbiljne participacije navedenih resornih ministarstava u okviru njihovih nadležnosti, u realizaciji individualnih planova zaštite djece u riziku i djece maloljetnih počinioca krivičnih djela, nije moguće postići očekivane rezultate na planu prevencije maloljetničkog prijestupništva (primarne, sekundarne i tercijarne).